



Penduduk Palestin mengisi air paip dalam botol dan bekas di Kem Pelarian Jabaliya di Utara Semenanjung Gaza.



Pencemaran air di Gaza meruncing

BERITA HARIAN 26/5/17 M/S 49

→ Kandungan tinggi garam punca penduduk derita masalah ginjal, saluran kencing

▪ Gaza

Semakin ramai penduduk Gaza jatuh sakit akibat pencemaran air, mengentengahkan isu kemanusiaan dihadapi wilayah yang disifatkan Pertubuhan Bangsa-Bangsa Bersatu (PBB) tidak lagi sesuai dihuni menjelang tahun 2020.

Pengurus besar pihak berkuasa air Gaza, Monther Shoblak berkata, keadaan sudah mencapai kemuncak krisis di wilayah digegarkan dengan peperangan, tidak membangun dan terkepung itu.

"Lebih 97 peratus air tidak sesuai untuk penggunaan domestik kerana kandungan tinggi garam yang tidak pernah dilihat sebelum ini," katanya.

Pertubuhan Bangsa-Bangsa Bersatu (PBB) juga meletakkan kekura-

ngan dan pencemaran sumber air sebagai beban utama dihadapi penduduk Gaza.

"Jika bencana tidak berlaku tahun ini, ia akan terjadi dalam tempoh tiga tahun," kata pegawai bertanggungjawab mengenai isu air di UNHCR, Zidane Abu Zuhrir.

Bergantung air bawah tanah

Hampir dua juta penduduk di wilayah terkepung itu bergantung kepada air bawah tanah untuk keperluan peribadi dan komersial, menggunakan paip menerusi sistem awam usang atau dipam secara persendirian dari bawah tanah. Akibatnya, kesihatan penduduk semakin merosot.

"Setiap tahun, kami melihat peningkatan 13 hingga 14 peratus pesakit dimasukkan ke hospital dengan

Fakta nombor

97

PERATUS

air tidak sesuai untuk penggunaan domestik akibat garam tinggi

masalah buah pinggang," kata ketua nefrologi Hospital Syifa, Dr Abdallah al-Kishawi.

Masalah buah pinggang diketahui berpunca daripada tekanan, diabetes dan penyakit keturunan, namun tidak syak lagi pencemaran air juga adalah faktornya, kata Dr al-Kishawi.

Kadar garam tinggi, sebagai contoh, boleh menyebabkan batu kencing dan masalah saluran kencing.

Pada 2012 dan sekali lagi pada 2015, PBB menyenaraikan ancaman yang boleh menyebabkan wilayah itu tidak didiami lagi menjelang 2020.

Ia menyentuh tiga peperangan sejak 2008 dan kepungungan oleh Israel, kadar pengangguran tinggi menghampiri 44 peratus serta kekurangan makanan.

AFP